

NAQQIUT

Meerartaarnermut atatillugu aningaasaateqarfiliornissaq siunertaralugu inatsisissatut siunnersuummik Naalakkersuisut suliaqaqqullugit Inatsisartut aalajangiiffigisassaattut siunnersuut. Aningaasaateqarfiup sulinermikku akissarsiallit meerartaarnermut atatillugu akissaateqartinneqarnissamut periarfissaqanngitsut ullormusiaqartitsinermit pioreersumit pitsaanerusumik akissaateqalernissaat qulakkiissavaa, taakkua pisortani imaluunniit namminersortuni sulisuunerat apeqqutaatinnagu.

(Inatsisartunut ilaasortaq Naaja Nathanielsen, Inuit Ataqatigiit)

Akissuteqaat

(Aningaasaqarnermut Naalakkersuisoq)

Siullermeenera

Kalaallit Nunaanni meerartaarnermut atatillugu aningaasaateqarfiliornissaq siunertaralugu aalajangiiffigisassatut siunnersuuteqartoqarneranut Naalakkersuisut qujapput, siunnersuummilu tunngaviusumik siunertarineqartunut isumaqataalluinnarlutik. Meerartaarnermut atatillugu aningaasaateqarfiliortoqartinnaguli tamassuma qanoq aaqqissuunneqarnissaa aammalu siunnersuutip inuiaqatigiit aningaasaqarniarnerannut sunniutigisinnaasai eqqarsaatigilluarneqartariaqarput. Pissutsit tamakku siunnersuummi tunngavilersuutigineqartut inatsisissat piareersarlugut suliarineqarnerani misissoqqissaarneqaaqartariaqarput. Taamatuttaaq meerartaarnermut atatillugu nunani allani aaqqissuussisimanernit misilittakkat ilanngullugit misissor-neqartariaqarput.

Naalakkersuisut tunngaviusumik isumaqarput suliassat taamaattut akissaatit pillugit isumaqatiginninniarnernut ilanngullugit sulisitsisut sulinermillu inuussutissarsiuteqartut kattuffiisa akornanni isumaqatiginninniutigineqarsinnaasariaqartut, aammalu Naalakkersuisut isumaqarput meerartaarnermut atatillugu aningaasaateqarfiliorsinnaanissaq sulisitsisut sulinermillu inuussutissarsiuteqartut akornanni pingasoqiusamik isumaqatiginninniarnernit aqutugalugit pilersinneqarsinnaanissaa pingaaruteqartoq. Tassunga ilanngullugu nalunaarutigineqarsinnaavoq sulinngiffeqartarneq tamakkerlugu aningaasarsiaqartitsisarnissaq pillugu Naalakkersuisut sulinermik inuussutissarsiuteqartut kattuffiinik assigiinngitsunik ingerlaavartumik isumaqatigiissuteqartarmata.

Meeqqat ilaqutariillu meerartallit atugaasa pitsanngorsartuarnissaat sulissutigiuartariaqarparput. Meeqqat peroriartornerminni atugarisaasa pitsanngortinnissaat eqqarsaatigalugu naalakkersuinikkut suliniuteqartuarnissaq pisariaqarpoq, Naalakkersuisulli kissaatigaat tamakku ataqatigiissaagaasumik ingerlanneqartariaqarnissaat pitsaanerpaamik angisaqarnissaq anguniarlugu. Akileraartarnermut Atugarissaarnermullu Ataatsimiititaliarsuup sulilereersup sulinermini tamakku ilanngullugit isiginiartussaavai, Nalaakkersuisullu suliniutinik nutaanik aallartitsioqartinnagu Ataatsimiititaliarsuup isumalitissiissutissaa utaqqimaappaarniarpaat.

Tamanna tunngavigalugu Naalackersuisut siunnersuut taamak isikkoqartillugu tapersorsinnaanniglaat, inassutigaluguli siunnersuutip aappassaaneerlugu oqallisigineqarnissaa UPA 2011-mut kinguartinneqassasoq, meerartaarnermut atatillugu aningaasaateqarfiliorsinnaanisamik apeqqt Akileraartarnermut Atugarissaarnermullu Ataatsimiititaliarsuup sulineranut ilanngullugu suliakkiutigineqarnissaa siunertaralugu. Ilutigalugu Naalackersuisut ataatsimiititaliamut inassutigissavaat siunnersuutip aappassaaneerneqannginnerani allannguutissamik siunnersuuteqartoqassasoq taamaasiortoqarneratigut meerartaarnermut atatillugu aningaasaateqarfiliornissamut periarfissanik Naalackersuisut UKA 2011-mi saqqummiinissamik pissaaffilerneqassammata.